

蘓詩補註

卷一至卷三

蘇詩補註

卷之三

東坡先生編年詩卷一

後學查慎行補註

姪男開校刊

古今體詩四十二首

仁宗嘉祐四年己亥冬侍
老蘇公自蜀至荊州作

慎按南行集叙略云己亥之歲侍行適楚舟

中無事凡與耳目所接者雜然有觸於中而

發於咏歎蓋家君之作與弟轍之文皆在凡

一百篇謂之南行集十二月十八日江陵驛

書又按子由詩云初來寄荆渚魚雁賤宜客

楚人重歲時爆竹聲礫礫新春始涉五田凍

未生麥相攜歷唐許花柳漸芽坼蓋己亥十

月先生自眉州入嘉陵江經戎瀘渝涪忠夔
諸州下峽抵荊州度歲明年庚子正月自荆
門出陸由襄鄧唐許至開封道里歲月歷歷
可攷故欒城前集以郭綸一首壓卷初發嘉
州以下諸詩次之明萬歷朝焦弱侯叙東坡
外集自言得秘閣善本其編次一如欒城集
今從之施氏原本以辛丑十一月初赴鳳翔
詩爲冠而已亥庚子所作概棄弗錄開卷便
錯何取乎編年吾不解也

郭綸

公自注綸本河西弓箭手屢戰有功不賞自
黎州都監官滿貧不能歸今權嘉州監稅

河西猛士無人識日暮津亭閱過船
路人但覺驄馬瘦不知鐵槊大如椽
因言西方久不戰截髮願作萬騎先
我當憑軾與寓目看君飛矢集蠻獐

河西

漢書武帝初置張掖酒泉燉煌武威四郡昭帝又置金城郡爲河西五郡歐陽忞輿地廣記陝西路涼州漢武威郡前涼張軌後涼呂光皆據

此唐初爲涼州

弓箭手

宋史兵志鄉兵者選戶籍團結訓練以爲防守陝西曰保毅本周舊制開寶八年發平涼潘源二縣

後改河西節度

民治城隍因立爲保毅弓箭手咸平五年點沿邊丁壯六萬八千人與正兵同戍邊郡慶歷初悉勅爲保捷軍環慶保安亦各籍置曰河西弓箭手

附子由作

郭綸本蕃種騎闕雄西戎流落初無罪因循遂龍
鍾嘉州已經歲見我涕無窮自言將家子少小學
彎弓長遇西鄙亂走馬救邊烽手挑丈八矛所往

如投空平生事苦戰數與大寇逢昔在定川寨賊
來如群蜂萬騎擁酋帥自謂白相公揮兵取其元
糲糊腥血紅戰勝士氣振越敵如旋風蚩蚩羶裘
將不信勇且忠遙語相勸誘一矢摧厥胸短兵接
死地日落沙塵蒙馳歸不敢息馬口銜折鋒誰知
八尺軀脫命萬死中忽聞南蠻叛羽檄行忽忽將
兵赴危難瘴霧不辭衝行經賀州城寂莫無人蹤
攀堞莽不見入據爲築壙一旦賊兵下百計燒且
攻三月不能陷救至遂得通崎嶇有成績元帥多
異同有功不見賞憔悴落巴賓已矣復誰信言之

氣恟恟予不識郭綸聞此爲歛容一夫何足言竊
恐悲羣雄此非介之推安肯不計功郭綸未嘗敗
用之可前鋒

按子由作叙述郭綸生平最詳足與東坡
詩相發明余之附錄同時唱和凡以此也

初發嘉州

朝一作初發鼓闐闐西風獵畫旂故鄉飄已遠往意浩無邊

錦水細不見蠻江清可憐

一本作更鮮

奔騰過佛脚曠蕩造平

川野市有禪客釣臺尋暮烟相期定先到久立水潺潺

公自注是日期鄉僧
宗一會別釣魚臺下

嘉州

應劭漢書注順帝改青衣縣爲漢嘉以公孫述稱帝青衣人不賓光武
嘉之也干道志嘉州健爲郡禹貢梁州之域元和郡縣志漢健爲郡之

南安縣接近漢中之漢嘉縣因名大業二年併入眉州武德二年改嘉州割通義洪雅等四縣別置眉州九域志成都府路嘉州隸爲郡本朝爲上州治龍游縣冥船錄自眉至嘉一百二十里

錦水

太平寰宇記蜀江至成都濯錦鮮潤異于他水名濯錦江按嘉州距成都三百餘里故云錦水細不見

蠻江

太平寰宇記青衣水濯衣卽青故名至龍游縣與汶水合以其來自微外故曰蠻江又云有沫水自陽山縣流入初無陽山江之名施氏補註

佛脚

輿地紀勝開元中僧海通于瀆江沫水濛水三江合處鑿石爲彌勒大像高三百六十尺建七層閣以覆之積十九年工始脩唐韋臯大像記

畧云頭圍千尺目廣二丈其餘相好一一稱是陸放翁詩注云一泉泓然正在髻下每歲水漲不能及佛足

附子由作

放舟沫江濱往意念荆楚擊鼓樹兩旗勢如遠征
戍紛紛上船人檣急不容語余生雖江陽未省至
嘉樹巉巉九頂峰可愛不可住飛舟過山足佛脚
見江滸舟人盡歛容競欲揖其拇俄頃已不見鳥

牛在中渚移舟近山陰壁峭上無路云有古郭生
此地苦箋注區區辨蟲魚爾雅細分縷洗硯去殘
墨徧水如黑霧至今江上魚頂有遺墨處覽物悲
古人嗟此空自苦余今方南行朝夕事鳴櫓至楚
不復留上馬千里去誰能居深山永與禽獸伍此
事誰是非行行重回顧

犍爲王氏書樓

樹林幽翠滿山谷樓觀突兀起江濱云是昔人藏書處
磊落萬卷今生塵江邊日出紅霧散綺窗畫閣青氛氤
山猿悲嘯谷泉響野鳥嚶憂巖花春借問主人今何在

被甲遠戍長苦辛先登搏戰事斬級區區何者爲三墳
書生古亦有戰陣葛巾羽扇揮三軍古人不見悲世俗
回首蒼山空白雲

犍爲

水經江水東南過犍爲江陽縣酈注云故大夜郎國史記武帝使唐蒙伐西戎得夜郎國遂立犍爲郡元和郡縣志漢南安縣地周置沉犀郡

並立武陽縣開皇三年改犍爲縣西北至嘉州一百五十六里郭允蹈蜀鑑漢武帝元光四年始置犍爲郡今榮嘉眉等州卽其地

王氏書

樓

郭璞記犍爲縣北
百里有書樓山

慎按先生在黃州與王齊萬秀才詩云君家

稻田冠西蜀擣玉揚珠三萬斛塞江流秭起

書樓碧瓦朱欄照山谷齊萬字文甫蜀人時

寓居武昌縣當卽書樓主人也

過宜賓見夷牢

刻本作中訛

亂山

〔一〕統志宜賓在叙州漢犍道後周外江唐義賓宋宜賓原注嘉祐四年作

江寒晴不知遠見山上日朦朧含高峰晃蕩射峭壁橫
雲忽飄散翠樹紛歷歷行人挹孤光飛鳥投遠碧蠻荒
誰復愛濃秀安可適豈無避世士高隱鍊精魄誰能從
之游路有豺虎跡

宜賓

〔元〕和郡縣志漢南安縣地屬犍爲郡天寶元年改爲義賓屬戎州東南至州一百六十里太平寰宇記諸葛亮南征于此置郛鄢成後改郛鄢縣開元十七年爲義賓與元和志不合〔九〕域志太平興國元年避太宗諱改義賓爲宜賓太平寰宇記謂開寶九年改名者訛

慎按元方輿勝覽云夷牢山在叙州宣化縣
南夷人祭社於此飲酒歡樂夷語以樂爲牢
故名二蘇有過宜賓見夷牢亂山詩云云向

來諸刻本俱作夷中今据此改定以正傳刻
之譌

附子由作

江流日益深民語漸已變岸濶山盡平連峰遠排
漢慘慘瘴氣青薄薄寒日煖峰巒苦崖石草木條
幹短遙想彼居人狀類麕鹿竄何時遂平定戍卒
從此返

夜泊牛口

日落江霧生繫舟宿牛口居民偶相聚三四依古柳負
薪出深谷見客喜且售煮蔬爲夜殮安識肉與酒朔風

吹茅屋破壁見星斗兒女自咿嘸亦足樂且久人生本
無事苦爲世味誘富貴耀吾前貧賤難獨守誰知深山
子甘與麋鹿友置身落蠻荒生意不自陋今予獨何者
汲汲强奔走

牛口

失考咿嘸趙壹詩骯髒自骯髒

附子由作

行過石壁盡夜泊牛口渚野老三四家寒燈照疎
樹見我各無言倚石但箕踞水寒雙脰長壞袴不
蔽股日暮江上歸潛魚遠難捕稻飯不滿盂饑卧
冷徹曙安知城市歡守此田野趣祗應長凍餒寒

暑不能苦

牛口見月

掩窗寂已睡月脚垂孤光披衣起周覽飛露洒我裳山
川同一色浩若涉大荒幽懷耿不寐四顧獨彷徨忽憶
丙申年京邑大雨霽蔡河中夜決橫浸國南方車馬無
復見紛紛擽檝郎新秋忽已晴九陌尚汪洋龍津觀夜
市燈火亦煌煌新月皎如晝踈星弄寒芒不知京國喧
謂是江湖鄉今來牛口渚見月重淒涼却思舊遊處滿
陌沙塵黃

京邑大雨

東都事畧嘉祐元年夏四月河北大水壬子河決商胡六月社稷壇壞下詔令中外臣工疏時政缺失

蔡河

宋史河渠

志蔡河貫京師兼閔水洧水潁水王應麟困學紀聞建隆二年浚蔡河通陳潁之漕古琵琶溝也杜佑通典謂漢運路由浚儀十里入琵琶溝絕蔡河入陳州卽此矣太平寰宇記謂蔡河在開封縣南別有琵琶溝在縣南十一里卽舊宕渠者非也李濂汴京遺跡志源委較詳今脩載于後蔡河貫京城爲都人所仰閔水白尉氏歷祥符合于蔡是爲惠民河洧水自許田注鄆陵歷扶溝合于蔡潁水出鄭之大隗山注臨潁歷鄆陵扶溝合于蔡凡許鄭諸水悉會焉其自尉氏北流至戴樓門東廣利水門入城名西蔡河其從陳州門西普濟水門出城經通許接舊蔡河者名東蔡河

慎按仁宗嘉祐元年丙申先生舉進士過扶

風本集有鳳鳴驛記以年譜攷之公甫舉進

士明年丁酉丁成國太夫人憂歸蜀己亥冬

侍老蘇公再入京此詩乃己亥作故云忽憶

丙申年通篇多是追遡語王氏註謂嘉祐元

年至京師作者謬今改正

戎州

亂山圍古郡市易帶群蠻瘦嶺春耕少孤城夜漏閒往
時邊有警征馬去無還自頃方從化年來亦歛關頗能
貪漢布但未脫金鑲何足爭強弱吾民盡玉顏

戎州

元和郡縣志古夔國秦破滇通五尺道漢武通西南夷置夔道縣屬犍
爲郡戎獠之中最有人道故其字從人梁大同十年立戎州太平寰宇

記梁于此置六同郡又置戎州隋初郡廢而州存天寶元年改南溪郡羈縻三
十六州一百三十七縣並荒梗無戶口乾元中復爲戎州○又按下道志唐大
歷十五年改戎州爲叙州歐陽忞輿地廣記宋政和四年改戎州爲叙州蓋取
西戎卽叙之義二處互異存以脩攷吳船錄自犍爲縣至叙州一百五十里

群蠻

太平寰宇記其土有四族黎黎廬牟夷夏雜居
風俗各異其蠻獠之類不識文字言語不通

金鑲

南史狼牙修國
其王及貴臣皆

雲霞布覆脚以金繩爲絡帶金環貫耳唐書南蠻傳投和在真臘國南王宿衛
百人衣朝霞耳金鑲太平寰宇記戎州蠻獠風俗椎髻跣足鑿齒穿耳○按金
鑲耳飾也施
氏補註訛

附子由作

江水通三峽州城控百蠻沙昏行旅倦邊靜禁軍
閒漢虜更成市羅紈斬不還投瓊揀精密換馬瘦
孱顏兀兀頭垂髻團團耳帶環夷聲不可會爭利
苦閒關

舟中聽大人彈琴

彈琴江浦夜漏永歛衽竊聽獨激昂風松瀑布已清絕
更愛玉珮聲琅璫自從鄭衛亂雅樂古器殘缺一作破世已
忘千年寥落獨琴在有如老仙不死閤興亡世人不
容獨反古強以新曲求鏗鏘微音淡弄忽變轉數聲浮脆